

Insidias peram ad pueri struit altera, nec se
Missuram incautum dicit prius, omnia furtim
Quam voret, ac misero fletum & jejunia linquat.
Ille autem e culmo captandis pulcra locustis
Septa struit junco neſtens, nec pera, nec uvæ
Jam subeunt animo, textu sed gaudet inani.
It calicem hac illac per totum mollis acanthus;
Plurimus upilio veniens quem visere gestit,
Qui tibi miranti suspendet lumina, Thyrsi.
Nauta tulit calicis pretium Calydonius, orbem
Ingentem pressi lactis, pinguemque capellam.
Necdum etiam labro tetigi, sed conditus omni
Labe caret. quem ferre tibi facilisque volensque,
Dulcis amice, dabo, referas modo amabile carmen.
Invideo tibi nil: agedum, bone; carmina quando
Non umbris, credo, immemori servabis & orco.
T. Incipe bucolicum, dulcis Musa, incipe carmen.

Thyrsis ego ex Ætna, ætnæi Thyrsidis hæc vox.
Quæ loca, dum misere Daphnis tabescit, habebant
Quæ loca vos, Nymphæ? Pindusne, an Thessala Tempe?
Nam neque tum visæ vitrei sub gurgite Anapi,
Non Ætna in viridi, sacra nec in Acidis unda.

Incipe bucolicum, dulcis Musa, incipe carmen.
Illum etiam Thoes, secla & flevit luporum,
Illum etiam sylva torvus leo flevit ab alta.

Incipe bucolicum dulcis Musa, incipe carmen.
Multæ illi ante pedes vaccæ, taurique jacentes,
Multæ illi vitulæ, multæ adgemuere juvencæ.

Incipe bucolicum, dulcis Musa, incipe carmen.
Primus Atlantiades veniens de monte: quis, inquit,
Daphni, quis indigno miserum male perdit amore?

Incipe bucolicum, dulcis Musa, incipe carmen.